

Lëtzebuerg, den 12. August 2022

Här Fernand ETGEN
Chamberspräsident
LËTZEBUERG



DEMOKRATESCH
PARTEI

Chambre des Députés
Groupe Parlementaire

Här President,

Esou ewéi den Artikel 80 vum Chambersreglement et virgesäit,
bieden ech Iech, dës parlamentaresch Fro un den Här
Wirtschaftsminister weiderzeleeden:

*„An der däitscher Baubranche klammen d'Präisser momentan
zimmlech stramm - zemol de Präiss vum Beton a vum Stol.*

*Well eng Rëtsch Opträg dowéinst stornéiert ginn, ass an dëser
Branche eng Rezessioun ze befäerten. Eenzelner schwätze souguer
vun enger Vollbremsung fir déi däitsch Baubranche.*

*Virun deem Hannergrond wollt ech dem Här Wirtschaftsminister
folgend Froe stellen:*

- *Wéi huet sech d'Lag an der Baubranche zu Lëtzebuerg an
de leschte Wochen a Méint entwéckelt?*
- *Sinn eng Rei potenziell Opträg an Tëschenzäit ofgesot
ginn?*
- *Mat Bléck op déi steigend Energiepräisser am Hierscht a
Wanter 2022/2023, wat fir Perspektiven an Erwaardunge
ginn de Moment ronderëm d'Baubranche entwéckelt?“*

Mat déiwem Respekt,

André BAULER

9, rue du St. Esprit
B.P. 510
L-2015 Luxembourg

Tel. : 22 41 84 1
Fax : 47 10 07


dp@dp.lu
www.dp.lu



Gemeinsam Äntwert vum Minister fir Mëttelstand an dem Wirtschaftsminister op d'parlamentaresch Fro n° 6657 vum 16. August 2022 vum Här Deputéierten André Bauler.

Wéi huet sech d'Lag an der Baubranche zu Lëtzebuerg an de leschte Wochen a Méint entwéckelt?

Nodeems den "Indicateur d'activité" vum Bausector (cf. Grafik 1) am 1. Trimester 2022 een Héichpunkt erreecht huet, ass dësen Ufanks vum 2. Trimester 2022 gefall a bleift däitlech hannert dem Niveau vu virun der Covid-19 Kris.



Grafik 1 : Entwécklung an Aussicht vum Indicateur d'activité vum Bausector, 2008-2022^[1] / Source : Chambre des Métiers « L'Artisanat au 2e trimestre 2022 : Les tendances inflationnistes inquiètent les entreprises artisanales »


D'Betriber aus dem Bausector si bis zum 1. Trimester 2022 relativ gutt aus der Kris vum Covid-19 komm, ënnert anerem bedéngt duerch déi verschidde Regimier vu staatlechen Hëllef, déi vun der Regierung an d'Liewe geruff goufen. Sou ass den "Indicateur d'activité" vum 1. Trimester 2021 op dat 1. Trimester 2022 vu -23 op +12 geklommen. Dës Relance ass awer gebremst ginn, ënnert anerem duerch Strategie vum « Null-Covid » a China, déi zu weidere Produktiouns-ënnerbriechunge gefouert huet an den Ausbroch vum Krich an der Ukrain huet dësen Trend nach verschäerft.

Och wann d'Optragsbicher an der Baubranche aktuell op engem héijen Niveau vu 7,9 Méint sinn, sou geet de Secteur awer dovun aus, dass dësen Niveau virun allem bedéngt ass duerch

d'Retarden, déi an der Pandemie-Kris zustaane komm sinn, a manner enger positiver konjunktureller Situatioun ze verdanke wier. D'Betriber fäerten deemno, dass d'Optragsbicher séier wäerte schmélzen, well eng sëllege Clienten hir Opträg riskéieren no hannen ze verleeën oder souguer ganz ze annulléieren, dëst virum Hannergrond vun enger substantieller Präisdeierecht an der Perspektiv vu klammenden Zënse.

D'Vertraue vun den Entrepreneuren aus dem Bausecteur hat der Enquête vum Statec no am 1. Trimester 2022 en Héichpunkt erreecht. Dësen Indicateur baséiert op zwou Froen aus dem Statec senger Enquête de conjoncture, engersäits zum Stand vun de Optragsbicher an anerersäits zum Ausbléck fir den Emploi an den nächsten 3 Méint. Dës zwou Komponenten hunn sech am 2. Trimester verschlechtert an am Juli an August stabiliséiert. Trotz dësem rezente Réckgang vum Vertraue vun de Baufirmen, bleibt dëst nach ëmmer op historesch héijen Niveauen. Dës Tendenzen, déi fir de Bausecteur zu Lëtzebuerg beobacht ginn, si ganz vergläichbar mat deene vun der Eurozon.

D'Präisdeierecht am Bausecteur ass eng Realitéit a spigelt sech souwuel um Niveau vun den Energie-, de Material- an de Personalkäschten zréck. De Krich an der Ukrain an d'Perturbatioun vun de Liwwerketten hunn eng däitlech Präisdeierecht zur Konsequenz, déi fir eng Rei Betriber schwéier ze bewältegen ass. Sou erweist sech d'Opstelle vun engem einfachen Devis méttlerweil als schwiereren Exercice.



Grafik 2 : Entwécklung vun den Energie- a Materialpräisser (Index 100 = 01/2020)

Och wann ee Groussdeel vun de Präisser zanter Ufanks vum Krich réckleefeg ass, sou stagnéieren d'Präisser op enger héijen Niveau am Verglach zu de Präisser vu virun der sanitärer Kris. Sou ass de Präis vum Holz am Verglach mat Januar 2020 am Duerchschnitt ëm 93 % an de Präis vum Stolbeton ëm 81 % geklommen.

Dobäi hunn sech d'Energiekäschten no der russescher Aggressioun an der Ukrain drastesch entwéckelt an d'Präisser vum Brennstoff si vu Januar 2020 bis Juli 2022 ëm 92% geklommen. Mam Gesetz vum 15. Juli huet d'Regierung dofir 2 wichteg Regimenter an d'Liewe geruff fir de Betriber finanziell ënnert d'Äerm ze gräifen :

- Op där enger Säit gëtt et eng Hëllef fir deene Betriber ze hëllefen, déi grouss Energieverbraucher sinn. Hei kann de Staat en Deel vun de Méikäschten am Gas an am Elektreschen iwwerhuelen.
- Donieft gëtt et och ee Regimm fir verschidde Secteuren, ënnert anerem de Bausecteur, bei der Entwécklung vum Präis vum Diesel ze entlaaschten.

Ënnert dem Stréch kann ee soen, dass d'Méikäschte vu Material, Energie a Personal d'Marge wäerten drécken an d'Verkaufspräisser fréier oder spéider riskéieren ugepasst ginn.

[\[1\]](#) D'Grafik stellt de Solde tëschent positiven an negativen Äntwert duer, lisséiert mat enger Moyenne mobile vu 4 Méint.

Sinn eng Rei potenziell Opträg an Tëschenzäit ofgesot ginn?

D'Handwierkerkummer huet vu verschiddene Baufirmen d'Informatioun kritt, dass vereenzelt potentiell Projeten annulléiert goufen. Mat der Präisdeierecht vu Material an Energie zécken d'Privatclintien zum Deel fir gréisser Bau- oder Renovatiounsprojeten unzegoen.

Och am ëffentleche Sektour si verschidde Gemengen, déi fäerten dass hir Budgeten iwwerschrott ginn an obwuel et den Ament onméiglech ass dës Phenomen ze quantifizéieren, sou gëtt et awer e puer Indicateuren, déi undeiten, dass d'Geschäftsklima amgang ass sech ze verschlechteren.

Mat Bléck op déi steigend Energiepräisser am Hierscht a Wanter 2022/2023, wat fir Perspektiven an Erwaardunge ginn de Moment ronderëm d'Baubranche entwéckelt?

Wann een all dës Elementer a Betruecht zitt, muss een dovun ausgoen, dass d'Aktivitéit am Bausecteur wäert un Dynamik verléieren. Den Impakt duerch de Krich an der Ukrain ass net vun der Hand ze weisen a bréngt eng gewëssen Onsécherheet mat sech.

Laut der "Enquête de conjoncture" vun der Handwierkerkummer ginn d'Entrepreneuren dofir och dovun aus, dass d'Aktivitéit am 3. Trimester 2022 wäert réckleefeg sinn. D'Baubranche stellt sech deemno op zwee schwiereg Joren an, enger ugespaanter Situatioun där d'Regierung sech och bewosst ass.

Dofir sinn déi verschidde Moosnamen, déi an der Tripartite vum 31. Mäerz 2022 festgehale goufe mat Sécherheet ee wichtege Bestanddeel fir de Betriber eng gewësse Planungssécherheet ze ginn, ënnert anerem duerch déi 2 Hëllefsgesetze, déi mam Gesetz vum 15. Juli 2022 an d'Liewe geruff goufen.

D'Regierung wäert awer och weiderhin hir Responsabilitéiten iwwerhuelen. An der Tripartite vun de kommenden Deeg wäert déi aktuell Situatioun am Detail mat de Sozialpartner analyséiert an no gemeinsamen a konkreten Äntwerte gesicht ginn.

De Minister fir Mëttelstand

(s.) Lex Delles